

中華文史叢書之一
明抄本影印
王有立主編

唐大詔令集

(五)

宋敏求編

台灣華文書局印行

唐大詔令集卷第一百八

宋 宋敏求編

政事

營繕

建玉華宮於宜君縣鳳皇谷詔

玉華宮成曲赦宜君縣制

停修金仙玉眞兩觀詔

停修大明宮詔

大明宮成放免囚徒等制

改明堂爲乾元殿詔

興慶宮成御朝德音

禁約上

關內諸州斷屠酤詔

關內諸州斷屠殺詔

廢潼關以東緣河諸關不禁金銀綾綺詔

寫書御名不闕點畫敕

官人百姓衣服不得逾令式詔

禁斷大酺廣費敕

禁珠玉錦繡敕

禁奢侈服用敕

營繕

建玉華宮於宜君縣鳳皇谷詔

朕聞上代無爲檐茅而砌土中季華用祀玉而臺瓊燥溼之
致雖同奢儉之情則異朕承皇王之緒執造化之綱包萬類
於心端圖八紘於目際方夏一軌區宇大同雖則德有劣於
難名道方參於至有若乃制衣服裳之后環并羈馬之君强
弧制矢之奇運車浮舟之智濟時爲美功亦大焉至若浩浩
九齡炎炎七載融山圻地滔天襄陵生人之艱勞亦極矣彼
數德者功莫高乎吞敵此兩災者勞又甚乎裁宮今雖菲食
卑居有慙於曩哲安人濟難不慙於前賢然而人皆輕見重
聞責耳賤目德雖微也以其古而爲著功雖巨也以其今而
成小不已謬哉每流鑒於前經常披懷而自勗思所以收驕
閑逸卷欲除華而頻年已來憂勞煩結暨於茲歲風疾彌時

嗟乎濟世之心患攢躬而靡制摩天之力痛沈已而難移重
以景熾流金風揚溽暑遭迴几席旭暮增煩俯仰巖廊寢興
添弊唯冀廓景延涼蕩茲虛憊近因羣下之志南勞翠微本
絕丹青之工纔假林泉之勢峰居隘乎蟲腳山逕嶮乎螭原
雖一己之可娛念百僚之有倦所以載懷爽塏爰制玉華故
遵意於潭朴本無情於壯麗尺版尺築皆悉折庸寸作寸功
故非虛役猶恐遐邇乖聽方興怨咨非其樂勞人而竭力好
峻宇而雕牆但以養性全生不獨存私存己怡神祈壽良以
爲國爲人比者屢有征行非無疲頓前歲問罪遶左去秋巡
幸靈州皆以翦害除凶懷柔服叛豈欲矜轍跡騁游盤而已
哉今復土木頓興營繕屢動永言及此深念人勞一則以爲

慙一則以爲愧何則匈奴爲患自古有之十月防河人血丹
於水脈千里轉戰漢骨浩於塞垣當此之疲人不堪命尙興
未央之役猶起甘泉之功今毳幕穹廬聚爲郡縣天山瀚海
分爲苑池去既往之長勞成將來之永逸避迴一年之力役
創此新宮想志士哲人不以爲言也布告黎庶明此意焉

貞觀

二十一年七月

玉華宮成曲赦宜君縣制

昔武周應天剋瑤臺而靡處漢高作極獲負陽而不居散服
桃林革命先於卜洛旣遷粉社創制肇於疏龍朕御九成有
乖斯義以茲撫事尤須改作何者文營仁壽槩日臨雲煬起
乾陽銜珠帶璧比阿房而競爽猶且有加擬傾宮而騁麗全

爲具體隋德云謝其徵在茲朕悼於懷爲日旣久故違其侈
義顯茲令辰加以心懷濟育事切於肌膚亟犯風霜疾纏於
腠理每至隆曦屆候大火摘芒雖對寒泉如升頭痛之阪或
居珍簟若涉炎火之林由是岳牧憂惶公卿駭懼因累陳丹
款請建山宮歷載深惟竊愛百金之費詳思至理宜順萬姓
之心朕往冒兵凶爲黔首而忘己今茲清暑豈勞人而取安
但以上奉宗祧下寧兆庶身非己有不可自輕敬思休攝之
方兼履古先之道發明二恉創此一宮卽澗疏隍憑巖構宇
土無文績木不雕鏤矯鋪首以荆扉變綺窗而甕牖負展協
幽貞之賞垂纘體嘉遁之情振此冲規方垂帝範令旣成之
不日賴洽普天宜順發生宏茲霈澤可曲赦宜君縣官及百

姓并督作官人丁匠等大辟罪以下常赦不免者不在赦例其營造監當官人量加品秩及衛士以上並節級賜物先在宮苑內住移出外者給復三年

貞觀二十二年二月

停修金仙玉真兩觀詔

營建創造必有所因豈欲勞人蓋不獲已朕頃居諒闇煢疾於懷奉爲則天皇后東都建荷澤寺西京建荷恩寺及金仙玉真公主出家京中造觀報先慈也豈願廣事營構虛殫力役朕每卑宮菲食夕惕宵衣惟木從繩虛心啟沃所欲修營兩觀外議不識朕心書奏頻繁將爲公主所置其造兩觀並停其地便充金仙玉真公主邑司令寶懷貞檢校所有錢物瓦木一事以付公主邑司收掌諸處供兩觀用作調度限日

送納邑司朕當別處創造終不勞煩百姓此度修葺公私無損若有干忤當置於刑

景雲三年三月

停修大明宮詔

卑宮致美愛人之力靈臺罷營重費之廣景彼前列吾無閒然頃以所居殿院素非宏敞時方暑雨頗有鬱蒸上稟聖慈式遵時令將修別寢順彼高居雖復工徒所須止於蕃匠補葺所擬無煩外力然以麥秋爰及農務方勤維夏在辰執役爲弊營之則眾物有勞而一己逸罷之則我躬未泰而氓庶安夫生人樹君將利之也勞人自奉予所不爲其修大明宮宜卽停待至閑月方使畢功宣示百寮使知予意所有先役工匠卽優還價直勿令懸欠仍卽放散

先天二年五月

大明宮成放免囚徒等制

黃門朕聞養人者謂之帝王蓋御於天下故作爲棟宇以避燥溼居於臺榭以順高明斯乃奉時而行政也朕以不德祗膺睿圖寶十家之產愛兆人之力未嘗興功於土木役思於池籞冀之休艾以致雍熙自律應長羸時方大暑溽雲屢起溫風且至伏以太上皇宴居頤衛滌慮清閑迹不往於甘泉心每期於汾水朕侍於左右以奉晨夕助元默之化則虧於聽理當炎蒸之序又黷以囂煩惕焉載懷敢忘順色然文明勗造先聖所營卽舊不加因時而往千門萬戶外雖謂於別宮一日三朝中自連於複道下所以寧問安之懇上所以資君靜之娛實獲我心俾康政體古有服珍裘者則念人之寒

居夏屋者則念人之熱況比歲阻饑甫田不稔或愚人陷罪
鬪土稱冤凡厥庶寮將何以卹兩京及諸州宜令長官親理
疑獄除犯名教及官典犯賊并緣妖僞以外餘罪徒以下咸
宜放免其有茂才異等拔眾超羣緣無紹介久不聞達者咸
令自舉朕當親問其應宣撫使名聞舉人試第四等宜準舊
例別加優獎見任人各量與改轉前資常選人至各依選例
與處分其未出身者並授散官先天以來軍將押官等在於
戰陣亡者令本軍勘績奏聞其妄說災祥誑惑閭里並令州
縣長官等嚴加捉搦仍令御史金吾訪察繩糾有能直言極
諫補朕之闕者各封狀進朕將親覽如有可采當加獎擢其
皇親諸親及東宮承值任員外檢試管官並停至今冬處分

者有家道貧迫情願外任者亦令所司勘績量才注擬其緣
坐流人處置有輕重不類者令所司勘會奏聞主者施行

開元

二年六月八日

改明堂爲乾元殿詔

古之操皇綱執大象者何嘗不上稽天道下順人極或變通
以隨時爰損益以成務且衢室創制度堂以筵因之以禮神
是光孝享用之以布政蓋稱視朔先王所以厚人倫感天地
者也少陽有位上帝斯歆此則神貴於不瀆禮殷於至敬今
之明堂俯鄰宮掖比之嚴祀有異肅恭苟非憲章將何軌物
由是禮官博士卿大夫廣參羣議欽若前古宜存路寢之式
用罷辟雍之號可改爲乾元殿每臨御宜依正殿禮

開元五年八月

興慶宮成御朝德音

朕昔在藩國此惟邸第乾坤未泰陰陽尙蒙則有神物效靈
祥符肇配飛佳氣於在田之際湧瑞池於或躍之時惟此舊
居式加新宇周牆僅板於百堵卑宮不階於五尺棟梁之用
毀撤所餘聊以紀天地之休徵貽子孫之儉約耳屬春令爲
始時惟發生萬方來朝千官入賀旣稱觴以獻壽宜施惠以
布德況農祥在候稼穡正興或幽彼囹圄獨隔陽和之澤或
迫於征徭不遂農桑之務言及於此軫歎良久其徒以下罪
且令責保并應當番兵丁匠等灼然單貧者所由勘會並放
營農所在訴訟長官隨事疏理勿使冤滯非軍國所要餘不
急之務一切並停仍加勸課循植農穡其河北水損戶旣屬

春事慮有乏絕不支濟者宜委使與知縣相度量加振卹諸處行人之家及鰥寡惻獨不能自存者州縣長官親加優撫使得存濟應有差科量事矜放且宣風布化職在令長有司銓藻之次特宜審擇其才惟德與刑爲政之要頃無關於風化多取威於檟楚理人之道其若是乎愚昧之流或輕抵犯宜加曉諭使識章程其含生之類不得輒有屠殺天下捕獵亦宜禁斷仍嚴加捉搦百司各遵時令務宏寬大之典使政理無失稱朕意焉

開元十六年正月

禁約上

關內諸州斷屠酤詔

酒醪之用表節制於歡娛芻豢之滋致甘旨於豐衍然而沈

涵之輩絕業亡資情竄之氓騁嗜奔慾方今烽燧尙警兵革
未寧年穀不登市肆騰踊趨末者眾浮冗尙多肴羞麴蘖重
增其費去弊之術要在權宜令關內諸州官民且斷屠酤武德
二年
二月

關內諸州斷屠殺詔

有隋失馭喪亂引多民物凋殘俗化踰侈耽嗜之娛競逐旨
甘屠宰之家恣行剗殺芻豢之畜靡供肴核之資胎卵之羣
莫遂蕃滋之性傷財墮業職此之由攘斂穿窬因茲未息禮
曰君無故不殺牛大夫無故不殺羊士無故不殺犬豕庶民
無故不食珍非惟務在仁愛蓋亦示之儉約方城未寧凡須
節制凋弊之後宜先長育豈得恣彼貪暴殘殄庶類之生苟

徇目前不爲經久之慮導民之理有未足乎其關內諸州宜
斷屠殺庶六蓄滋多而兆民殷贍詳思厥衷更爲條式

武德三年

四月

廢潼關以東緣河諸關不禁金銀綾綺詔

遠至邇安昔王令典通財鬻貨生民恆業關梁之設襟帶要
衝義止懲姦無取苛暴近代培刻禁禦滋彰因山川之重阻
聚珍奇而不出遂使商旅寢廢行李稽留上失博厚之恩下
畜無聊之怨非所以綏安百姓懷輯萬邦化洽升平克備至
治朕君臨區宇情慄覆育率土之內靡隔幽遐欲使公私往
來道路無壅貨寶交易中外匪殊思改前弊以清民俗其潼
關以東緣河諸關悉宜停廢其金銀綾綺等雜物依格不得

出關者並不須禁

武德九年八月

寫書御名不關點畫敕

孔宣設教正名爲首戴聖貽範嫌名不諱比見鈔寫古典至於朕名或贖其點畫或隨便改換恐六籍雅言會意多爽九流通義指事全違誠非立書之本意也自今以後繕寫舊典文字並宜使成不須隨義改易

顯慶五年正月

官人百姓衣服不得逾令式敕

敕采章服飾本明貴賤升降有殊用崇勸獎如聞在外官人百姓有不依式令遂於袍衫之內著朱紫青綠等色短衫襖子或於閭野公然露服貴賤莫辨有蠹彝倫自今以後衣服上下各依品秩上得通下下不得僭上仍令所司嚴切禁斷